

Visoki predstavnik Valentin Inzko u posjeti Moskvi

Visoki predstavnik Valentin Inzko danas se sastao s visokorangiranim zvaničnicima iz Ministarstva vanjskih poslova Ruske Federacije, uključujući i zamjenika ministra vanjskih poslova, Alekseya Meshkova, a sudjelovao je i u radu konferencije organizirane povodom predstojeće 20. godišnjice potpisivanja Daytonskog mirovnog sporazuma.

Na konferenciji, visoki predstavnik Inzko rekao je da značaj Daytonskog mirovnog sporazuma nije samo u tome što je ovim sporazumom okončan rat, nego je on osigurao i polaznu tačku da Bosna i Hercegovina krene dugim putem oporavka.

Visoki predstavnik je naveo zajedničke identifikacijske isprave, jedinstvenu valutu i registracijske tablice kao ključne korake koji su stimulirali trgovinu i omogućili građanima da se slobodno kreću širom zemlje, bez obzira na njihovu etničku pripadnost. „Ova sloboda kretanja danas se uzima zdravo za gotovo, ali je imala centralnu ulogu za otvaranje Bosne i Hercegovine prema sporom i kompleksnom procesu reintegracije“.

Druga važna postignuća u posljednjih dvadeset godina uključuju uspostavu okvira kojim se raseljenim licima i izbjeglicama omogućio povratak prijeratnih domova, te temeljitu reformu sigurnosnog i odbrambenog sektora u zemlji.

Visoki predstavnik je objasnio da centralizacija nikada nije bila cilj međunarodne zajednice, nego je to bilo postizanje „pomirenja, funkcionalnosti i reintegracije“ i zemlje koja „radi zajedno i kao jedan da bi postigla bolju budućnost za sve“.

Kako vrijeme prolazi, uloga međunarodne zajednice u zemlji se mijenja, a od građana Bosne i Hercegovine se očekuje da

preuzmu odgovornost “za budućnost koju žele za sebe, za svoju zemlju i naravno za svoju djecu”, rekao je visoki predstavnik.

Današnju konferenciju organizirao je Moskovski državni institut za međunarodne odnose. Među drugim učesnicima bili su bivši hrvatski predsjednik Stjepan Mesić i bivši predsjednik Vlade Savezne Republike Jugoslavije Milan Panić.